

# PLEIVS ROMAN CATOLICAS

Römisch-katholische Kirchengemeinden

LAAX // FALERA

## Oraziun tiel ritual da candeila duront la pandemia da Corona

*La conferenza dils uestgs svizzers e la baselgia evangelica-reformada dalla svizera han appellau communablamein dad envidar mintgamai la gievgia sera allas 20.00 ina candeila e tschentar quella sil sem finiastra. Quei segn da colligiazium, cuminonza e speranza vegn accompignaus dad ina cuorta oraziun sco p. ex. il Babnos.*

*Igl Institut liturgic metta a disposiziun quell'oraziun pil ritual da candeila.*

Diu, nossa veta e nossa glisch, biars carstgauns han envidau questa sera ina candeila. Igl ei in segn: Tia glisch sclarescha viaden en nossa notg. Dapi tschantaners ei quei aschia – era en quell'ura. Nus engraziein/Jeu engraziel a ti.

Assista quels ch'ei en prighel da veta. Schurmegia tut quels che lavuran el sector da sanadad. Rinforza tuts quels che sorprenden duront l'epidemia da Corona responsabladad e ston prender grevas decissions.

Diu, accompignader dils carstgauns, nus partin/jeu partel la glisch cun tut quels che tschantan ina candeila sin sem finiastra. Igl ei in segn: En tei essan nus colligiai cun cristians e cristianas e cun biars auters carstgauns – ina cuminonza universal.

Nus engraziein/Jeu engraziel a ti.  
Seigies maneivel a quels ch'ei isolai.  
Regala pazienza e quietezia a partenaris e famiglias, nua che la vischinonza permanenta daventa pli e pli greva.

Diu, nossa speranza,  
nus vegnin/jeu vegn tier tei cun patratgs, quitaus ed oraziuns. La candeila ei in segn: ti eis cheu, uss, en quei mument – independent co ei va vinavon en quella greva situaziun. Nus engraziein/jeu engraziel a ti.  
Schurmegia nus. Seigies maneivel als moribunds. Meina ils defuncts en tia glisch splenduronta.

*Vus saveis aschuntar autras supplicas ni ils nums da persunas.*

Ella splendur da tia glisch urein nus:  
Bab nos,  
qual che ti eis en tschiel,  
sogns vegni fatgs il tiu num.  
Tiu reginavel vegni tier nus,  
tia veglia daventi sin tiara sco en tschiel.  
Nies paun da mintgadi dai a nus oz.  
Perduna a nus nos puccaus,  
sco nus perdunein a nos culponts.  
E meina nus buca en empruament,  
mobein spendra nus dil mal.  
Pertgei tes ei il reginavel,  
tia la pussonza e la gloria a semper.  
Amen.